

## ԱՌԱՋԻՆ ՀԱՄԱՏԵՂ ԲԱՆԱԿՈՒՄԸ

Հանձնարանի գեղատեսիլ բնութեան գրկում արդէն 7րդ օրն է, ինչ իրենց համատեղ բանակումն են սկսել Հայ Մարմնակրթական Ընդհանուր Միութեան ԱՄՆ արեւմտեան շրջանի եւ Հայաստանի տարբեր մասնաճիւղերի սկաւտները: Սա առաջին համատեղ բանակումն է Հայաստանում եւ նպատակ ունի հայրենիքի նորաստեղծ սկաւտական կազմակերպութիւններին փոխանցել կուտակուած հարուստ փորձն ու գիտելիքները: Ինչպէս ասաց Արեւմտեան Միացեալ Նահանգների շրջանային վարչութեան անդամ Մարո Քեշիշեանը, իրենց նըպատակը այստեղ Հայ Մարմնակրթական Ընդհանուր Միութեան սկաւտական ղեկավար կադրեր պատրաստելն է, նաեւ սփիւռ-հայրենիք կապերի ամրացմանն ու սերտացմանը նպաստելը:

Բանակումը կազմակերպելու նպատակով Արեւմտեան Միացեալ Նահանգներից Հայաստան են եկել աւելի քան քսան խմբապետ աստիճանաւորներ, որոնց ջանքերի շնորհիւ բանակումն ընթանում է արդիւնաւէտ, առանց բարդութիւնների:

Բանակումի ծրագրերի պատասխանատու, Արեւմտեան Միացեալ Նահանգների «Արարատ» մասնաճիւղի խմբապետ Օշին Փիրումեանի գլխաւորութեամբ Հայաստանի 11 շրջանների եւ Արեւմտեան Միացեալ Նահանգների շուրջ 90 արիներ ու արեւոյշներ ստանում են ազգային դաստիարակութեան եւ մարմնակրթական դասեր: Առաւօտեան մէկ ժամ տեւող մարմնամարզական վարժանքներով, սկաւտական խաղերով եւ դժուարանց գիշերային արշաւներով կոփում են իրենց կամքն ու առողջութիւնը: Այս պարապմունքների նպատակը գայիկների, արծուիկների ղեկավարներ, խմբակների պատասխանատուներ եւ խմբի խմբապետներ պատրաստելն է:

Յազեցած եւ խիստ կարգուկանոնի ենթակայ այս բանակումի կարեւոր մասն են կազմում դասախօսութիւնները: Սկաւտների համար Արցախում, Հայաստանում տիրող իրավիճակին, քաղաքական կուսակցութիւններին, Սեպտեմբերի 21ի հանրաժողովին, Լիսաբոնում զոհուած հինգ հայորդիներին եւ խանասորի արշաւանքին նուիրուած թեմաներով դասախօսութիւններով հանդէս են եկել «Ազատամարտ» թերթի խմբագիրներից Լեւոն Շիրինեանը, ՀՀ ԳԽ պատգամաւոր Սէյրան Բաղդասարեանը, Հայ Մարմնակրթական Ընդհանուր Միութեան Կենտրոնական Վարչութեան անդամ Վարդան Բախշեանը:

Հայ Մարմնակրթական Ընդհանուր Միութեան բանակումը տեւեց մինչեւ Յուլիսի 28ը: Մինչեւ Արեւմտեան Միացեալ Նահանգներ մեկնելը մեր հայրենակիցները կը ծանօթանան Հայաստանի տեսարժան վայրերին, պատմական կոթողներին, ցանկութիւն ունեն հանդիպել նաեւ խորհրդարանի անդամների, վարչապետի, քաղաքական յայտնի գործիչների հետ:

